

AVP:

Think Tank di partido tin un directiva di profesionalnan hoben y dinamico

ORANJESTAD - Diabierna e directiva nobo di FESCA, dedica awor na dr. mr. Mito Croes (qepd) a keda instala. Esaki a tuma luga despues di dos dia di discursonan di nivel halto, e asina yama 'Green Talks' den Cas di Partido na Playa.

E dos dianan aki por a conta cu un asistencia grandi, mayoria tabata hobennan cu ta interesa den e topiconan cu a wordo trata y cu kier keda na haltura di e vision y plannan di partido AVP pa den futuro.

E hoben economista Phillip LaReine ta e president nobo di Fundacion Mito Croes pa Estudionan Social Cristian Aruba. El a tuma e mandato over di Richard Arends, kende e ultimo añanan a dirigi e fundacion científico, e Think Tank, di partido AVP. LaReine a splica cu e retonan cu tin ta hopi. "Locual nos ta bay haci ta aporta y crea e vision di futuro pa e partido y pa Aruba. Nos ta bay pensa y enfoca riba diferente topico y atende cu tanto retonan actual como retonan di futuro. Asina ta cu nos ta bay tene nos mes ocupa cu retonan economico, social, retonan cu tin di haci cu prosperidad y bienestar di e comunidad. E ta bay ta algo masha amplio. Nos tin 17 meta sostenibel cu Nacionnan Uni a enfoca riba nan pa cumpli cu nan y nos lo pone atencion na tur 17."

E directiva nobo di Fundacion Mito Croes (FESCA) ta consisti di hendenan di estudio y calidad hopi diversifica. LaReine ta satisfecho cu esaki pasobra asina por haci bon uzo di nan capacidad intelectual, sigur mirando cu nan ta profesionalnan cu estudionan universitario riba varios tereño. "Nos tur ta hendenan cu ta custumbra di haci estudio y investigacionnan científico. E estudionan cu nos ta bay haci mester ta relevante pa henter comunidad di Aruba." Den e directiva nobo tin dos miembro cu ta biba y traha afo y esaki segun LaReine ta haci e directiva asina dinamico.

"Pa motibo cu nan ta biba y traha den exterior, nan tin un otro bista - un bista non-biased- riba cierto desaroyonan. Un di nan ta biba y traha na Londen y tin pensamiento internacional completamente diferente cu por yuda nos den nos enfoke, pasobra e por comparti cu nos e vision cu tin eyfo tambe riba e topiconan cu nos ta bay trata." □